



013

SEKTOR ZA CARINE

Broj: 03/2- 02-2-927 /18  
Banja Luka, 19.04. 2018. godine

REGIONALNIM CENTRIMA  
ODSJEKU ZA CARINSKE POSLOVE

**Predmet: Odluka o uslovima i postupku ostvarivanja prava na oslobađanje od plaćanja uvoznih i izvoznih dažbina, obavijest**

Odredbama člana 207. tačka a) Zakona o carinskoj politici u Bosni i Hercegovini ("Službeni glasnik BiH", broj 58/15) propisani su slučajevi oslobađanja od plaćanja uvoznih dažbina prilikom uvoza robe u Bosnu i Hercegovinu.

Shodno članu 208. Zakona o carinskoj politici u Bosni i Hercegovini Savjet ministara Bosne i Hercegovine donio je Odluku o uslovima i postupku ostvarivanja prava na oslobađanje od plaćanja uvoznih i izvoznih dažbina.

**Odluka o uslovima i postupku ostvarivanja prava na oslobađanje od plaćanja uvoznih i izvoznih dažbina** objavljena je u "Službenom glasniku BiH" broj 24/18, a **stupa na snagu** osmog dana od dana objavljivanja **tj. dana 25.04.2018. godine**, kada počinje njena primjena (u daljem tekstu: Odluka).

Danom stupanja na snagu Odluke (25.04.2018. godine) počinje se primjenjivati i član 207. Zakona o carinskoj politici u Bosni i Hercegovini kako je određeno članom 279. stav (2) tačka b) tog zakona.

Odlukom su propisani uslovi i postupak za ostvarivanje prava na oslobađanja od plaćanja uvoznih dažbina propisana odredbama člana 207. tačka a) Zakona o carinskoj politici u Bosni i Hercegovini, ograničenja u pogledu raspolaganja robom koja je oslobođena od plaćanja uvoznih dažbina, te prestanak carinskog nadzora, kao i za oslobađanja od plaćanja izvoznih dažbina pri izvozu (član 207. tačka b) navedenog Zakona; međutim, trenutno nema propisanih izvoznih dažbina).

U vezi toga, ukazujemo na sljedeće:

1. Na oslobađanja od plaćanja uvoznih dažbina (carinske povlastice) pri puštanju u slobodan promet za koje je roba prijavljena nadležnom carinskom uredu počev od 25.04.2018. godine primjenjuju se: član 207. tačka a) Zakona o carinskoj politici u Bosni i Hercegovini i odredbe Odluke (što uključuje i Priloge Odluke koji čine njen sastavni dio).
2. *Oslobađanje od plaćanja poreza na dodatu vrijednost* pri uvozu robe regulisano je članom 26. Zakona o porezu na dodatu vrijednost ("Službeni glasnik BiH", br. 9/05, 35/05, 100/08 i 33/17). Posljednja izmjena Zakona o porezu na dodatu vrijednost, objavljena u "Službenom glasniku BiH", broj 33/17, odnosi se na izmjenu člana 26. tačka 2. tog zakona (radi usklađivanja sa članom 207. tačka a) Zakona o carinskoj politici u Bosni i Hercegovini i ta izmjena se počinje primjenjivati takođe dana 25.04.2018. godine.

3. *Oslobađanje od plaćanja akcize na akcizne proizvode i putarine* regulisano je članom 30. stav (1) tačka c) i članom 38. Zakona o akcizama u Bosni i Hercegovini ("Službeni glasnik BiH", br. 49/09, 49/14, 60/14 i 91/17).
4. Radi primjene prednje navedenih propisa, Uprava za indirektno oporezivanje je, aktom broj: 03/2-02-2-579-2/18 od 18.04.2018. godine, donijela odgovarajuće izmjene i dopune Priloga II Uputstva o popunjavanju carinske prijave podnijete u pisanom obliku i korištenjem tehnike obrade podataka i zbirne prijave, koje se, pored ostalog, odnose na nove šifre za carinske povlastice (koje se takođe primjenjuju od 25.04.2018. godine) koje se upisuju u drugu potpodjelu polja 37 carinske prijave (JCI) za puštanje robe u slobodan promet uz oslobađanje od plaćanja uvoznih dažbina.
5. Članom 24. Odluke propisano je oslobađanje od plaćanja uvoznih dažbina na **"robu zanemarive vrijednosti"** sadržane u pošiljci poslanoj direktno iz druge države primaocu u Bosni i Hercegovini (carinska povlastica iz člana 207. tačka a) alineja 11) Zakona o carinskoj politici u Bosni i Hercegovini). U vezi predmetne carinske povlastice ukazujemo na sljedeće:
  - shodno članu 24. Odluke, a u svrhu primjene tog člana, "robom zanemarive vrijednosti" smatra se roba čija je ukupna vrijednost do 300,00 konvertibilnih maraka po pošiljci,
  - to u bitnome znači da sve pošiljke robe poslane direktno iz drugih država primaocu u Bosni i Hercegovini, bilo komercijalne ili nekomercijalne prirode (nezavisno o primaocu i da li se ista doprema u poštanskom ili vazdušnom saobraćaju), ukupne vrijednosti do **300,00** konvertibilnih maraka po pošiljci, ne podliježu plaćanju uvoznih dažbina,
  - u smislu primjene navedene carinske povlastice za "robu zanemarive vrijednosti", pošiljkom se smatra pošiljka robe od jednog pošiljaoca za jednog primaoca navedena na jednom dokumentu koji prati pošiljku (npr. faktura) i pristigla istim prevoznim sredstvom,
  - kada je primalac "pošiljke zanemarive vrijednosti" *fizičko lice* ta pošiljka mora ispunjavati i uslov u pogledu "robe nekomercijalnog karaktera" definisane članom 3. stav (1) tačka e) Odluke,
  - vrijednost jedne pošiljke *ne može se dijeliti* na način da se izdvoje pojedine robe koje su vrijednosti manje od 300,00 konvertibilnih maraka te se na tako izdvojenu robu primijeni oslobađanje,
  - oslobađanje od plaćanja uvoznih dažbina *ne odobrava se za*: alkoholne proizvode, parfeme i toaletne vode i duvan i duvanske proizvode,
  - pošiljka "robe zanemarive vrijednosti" koja je oslobođena od plaćanja uvoznih dažbina osloboda se od plaćanja i poreza na dodatu vrijednost shodno članu 26. stav 2. Zakona o porezu na dodatu vrijednost,
  - puštanje pošiljke "robe zanemarive vrijednosti" u slobodan promet uz oslobađanje od plaćanja uvoznih dažbina ostvaruje se usmenom carinskom deklaracijom (prijavom) shodno članu 25. Odluke, dakle, ne sprovode se nikakve pisane carinske formalnosti.
6. Članom 26. Odluke propisano je oslobađanje od plaćanja uvoznih dažbina na **robu nekomercijalnog karaktera sadržanu u pošiljci (povremene) koju besplatno šalje fizičko lice iz druge države fizičkom licu u Bosni i Hercegovini** (carinska povlastica iz člana 207. tačka a) alineja 12) Zakona o carinskoj politici u Bosni i Hercegovini), **u vrijednosti do 90,00 konvertibilnih maraka po pošiljci**. U navedenu vrijednost pošiljke se (za razliku od pravila u putničkom prometu) uključuje i vrijednost robe iz člana 23. stav (5) Odluke kada tu robu sadrži pošiljka.

Uslovi za primjenu navedenog oslobađanja takođe su propisani članom 26. Odluke, a oslobađanje od plaćanja uvoznih dažbina odobrava se usmeno shodno članu 27. Odluke.

Roba iz člana 26. Odluke koja je oslobođena od plaćanja uvoznih dažbina osloboda se od plaćanja i poreza na dodatu vrijednost i od plaćanja akcize (ako pošiljka sadrži akciznu robu iz člana 26. stav (5) Odluke), a u skladu sa propisima navedenim u tački 2. i 3. ovog akta.

7. Članom 34.-35. Odluke propisano je oslobađanje od plaćanja uvoznih dažbina **na robu nekomercijalnog karaktera u ličnom prtljagu koju putnici unose sa sobom iz druge države** u propisanoj vrsti, vrijednosti i količini, te uslovi za primjenu tog oslobađanja.

Predmetno oslobađanje, prema članu 34. st. (2) i (4) Odluke, odobrava se:

- na robu nekomercijalnog karaktera, uz propisana količinska ograničenja po putniku i danu, navedenu u stavu (2) tog člana, te
- na ostalu robu nekomercijalnog karaktera ograničenu na predmete u vrijednosti **do 600,00** konvertibilnih maraka po putniku i danu, nezavisno od vrste prevoznog sredstva kojim putnik putuje. U tu vrijednost se, prema članu 34. stav (5) Odluke, ne uračunava roba navedena u stavu (2) tog člana.

Navedena roba koja je oslobođena od plaćanja uvoznih dažbina oslobađa se od plaćanja i poreza na dodatu vrijednost i od plaćanja akcize (ako pošiljka sadrži akciznu robu iz člana 34. stav (2) Odluke), a u skladu sa propisima navedenim u tački 2. i 3. ovog akta.

8. U prilogu ovog akta, u informativnu svrhu, dostavljamo vam *Korelacijsku tabelu za carinske povlastice* propisane prednje navedenim carinskim propisima.
9. Ovaj akt i Korelacijska tabela iz tačke 8. objaviće se na Web stranici UIO: [www.uino.gov.ba](http://www.uino.gov.ba) u dijelu pod nazivom Propisi.
10. O predmetnom dužni ste upoznati vaše organizacione jedinice, a putem njih i učesnike u carinskom postupku.

Prilog: Korelacijska tabela, kao u tekstu

Dostaviti:

1. Naslovu, sa prilogom
2. Kabinetu direktora, sa prilogom
3. Sektorima i Odjeljenjima u Glavnoj kancelariji
4. a/a

